

Indeks jenayah turun 15.35%
Malaysiakini.com
Mei 6, 2010

Indeks jenayah di seluruh negara bagi tempoh empat bulan pertama tahun ini menunjukkan penurunan hasil inisiatif di bawah Bidang Keberhasilan Utama Negara (NKRA).

Timbalan Menteri Dalam Negeri, Datuk Wira Abu Seman Yusop, berkata bagi tempoh itu indeks jenayah turun sebanyak 15.35 peratus, manakala jenayah jalanan pula menurun 38.7 peratus, berbanding tempoh sama tahun lalu.

"Dari segi angka bagi indeks jenayah untuk tempoh Januari hingga April tahun 2010 terdapat sebanyak 59,661 kes berbanding 70,481 kes bagi tempoh yang sama tahun 2009, di mana penurunan sebanyak 10,820 kes.

"Bagi kes jenayah jalanan pula bagi tempoh Januari hingga April 2010 terdapat 8,209 kes berbanding 13,391 bagi tempoh yang sama tahun 2009 dan ini bermakna penurunan sebanyak 5,182 kes," katanya dalam sesi soal jawab di Dewan Negara hari ini.

Beliau berkata demikian bagi menjawab soalan Senator Datuk Abdul Rahman Bakar yang meminta Menteri Dalam Negeri menyatakan keberkesanan program Rakan Cop terhadap pengurangan kadar jenayah di negara ini dan peratusan pengurangan jenayah melalui program ini berbanding keahliannya.

Abu S

eman berkata, sejak penubuhan program Rakan Cop pada 2004, seramai 336,363 orang telah mendaftar sebagai ahli di seluruh negara.

Katanya, sehingga kini sejumlah 1.7 juta maklumat berkaitan jenayah dan ketenteraman awam telah disalurkan oleh ahli-ahlinya menerusi khidmat pesanan ringkas (SMS) kepada Polis DiRaja Malaysia (PDRM).

"Rakan Cop ini adalah salah satu daripada inisiatif di bawah NKRA untuk mengurangkan indeks kadar jenayah sebanyak lima peratus dan jenayah jalanan sebanyak 20 peratus menjelang akhir tahun 2010.

"Semua inisiatif termasuk Rakan Cop sama ada yang telah, sedang dan akan dilaksanakan adalah saling berkaitan dan secara kolektifnya menyumbang kepada pengurangan jenayah, katanya.

- Bernama